

**Contrasto di uno, che, stimolato da un altro
a levarsi di letto, non vuol levarsi.**

CANZONE XIII.

Levte, Toni, su da li,
 Astu pa 'ncor pro durmi?
 Veustu 'ncor nen dete deuit,
 Bruta cera da pom cheuit;
 Levte, Toni, su da li,
 Astu pa 'ncor pro durmi?
 Va 'mpò atende ai teu mascogn,
 Lassa stè a durmi chi ha bsogn,
 Mi t'vad mai a destorbè
 Quand ti t' ses tacà a ronfè.
 Va 'mpò atende, ecc.

Oh che vita da porcas!
 Bela mal a dvantè gras!
 Dla manera i t'as pa por
 D'atachè quaich anfreidor.
 Oh che vita, ecc.

Pur ch'i m'leva da cogià
 Quand 'l tavo sia parià,
 Mi n'eu tant com'i na veui.
 Senza pieme tanti ambreui.
 Pur ch'i m'leva, ecc.

Oh si si t'veui argalè,
 Speta l'ora del disnè,
 I t'veui dete d'berle d'pors,
 Lassa pura fè da Giors.
 Oh si si, ecc.

Cosa tenstu tampestà,
 Sta 'mpò chet ch'i t'perde 'l fià,
 I veui ste si a to dispet
 A gargarisè ant 'l let.
 Cosa tenstu, ecc.

M'astu 'nteis, mostass da can,
 Veustu ste fin a doman
 Con le toe msenne a meui
 A marsè tuti i linseui?
 M'astu 'nteis, ecc.

Alo 'ncor da durè 'n pes?
 Va 'mpò al boja, brut increc;
 Astu 'ncora nen pro mnà
 Cousta diasne d'landnà?
 Alo 'ncor, ecc.

T'as bel fè, t'as peui bel di,
 Pensa pur pa pi d'durmi,
 S'i t'doveissa piè pr i bras,
 E striplete giù dal gias.
 T'as bel fè, ecc.

Va ch'a t'peussa sauté 'l flus,
 Va al malan, e sarme l'us;
 S'i dagh man ai me scarpas,
 Mi t'ij sbato ant 'l mostas..
 Va ch'a t'peussa, ecc.

I t'lo veui durvi pi largh
 Già ch'i t'veule 'ncor fè 'l gargh,
 Veui ch'i t'staghe strojassà
 Con le fnestre sbalassà.
 I t'lo veui, ecc.

Campa pura d'rabia 'l pis,
 Mi m'sbaruo pa 'n stis,
 Fin ch'a sia coul mesdi,
 Mi veui pa bogè da si.
 Campa pura, ecc.

Ma pr dite la vrità,
 Vahi! ch'i t'ses peui ostinà,
 I t'as bin un umoras
 Tal e qual com'un mulas.
 Ma pr dite, ecc.

- Va a le masche, testa d' mul,
 Cosa m' tenstu rot 'l cul?
 Lasme 'n poch arposè an pas,
 Venna 'l bsest al fica nas!
 Va a le masche, ecc.
- Si dag man a un savardon,
 Si ch' i t' mostro fè 'l poltron,
 Si ch' d' si ch' i t' dagh to rest,
 E t' fareu sauté su prest.
 Si dag man, ecc.
- Pijte guarda, fa pa 'l fol,
 Si saut su, mi t' torso 'l col,
 Veusto 'mpò giughè un douson
 Ch' i t' buto a toc e pson?
 Pijte guarda, ecc.
- Senti 'mpò coust poltronas
 A fè ancora del bravas;
 O via, ciapa, amprtinent,
 Cousti doi sgrognon sui dent.
 Senti 'mpò, ecc.
- Marcè prest, me bei vsin,
 Arestè coust assassin,
 Dunna dunna, agiut, agiut,
 Mi pover om ch' i colo tut.
 Marcè prest, ecc.
- Già ch' i t' crie com' un mat,
 Pijne ancor dontrè sul pat,
 E peui va anformè j' vsin,
 Ch' i tornreu doman matin.
 Già ch' i t' crie, ecc.
- Vate pur a fè squartè,
 Speta a vni ch' i t' manda piè;
 Oh! podeistu 'mpò al prim pas
 Rompte 'l col, le gambe, ij bras.
 Vate pur a fè, ecc.